

Gemeinsam Äntwert vum Här Pierre Gramegna, Finanzminister, vum Här Franz Fayot, Wirtschaftsminister, an vum Här François Bausch, Minister fir Mobilitéit an ëffentlech Aarbechten, op d'parlamentaresch Ufro N°3398 vum 7. Januar 2021 vum honorabelen Deputéierten Jeff Engelen zum Sujet "Subventions pour les entreprises de transports".

1. Wëll d'Regierung de Lëtzebuenger Speditiounsbetribler finanziell Hëllef fir dës Onkäschten ze kompenséieren? Si konkret Schrëtt virgesi fir de Speditiounen an all anere Branchen, déi am Stroosentransport aktiv sinn, ze erlaben, déi steierlech Méibelaaschtung auszegläichen?

Ofgesi vun de spezifeschen Ënnerstützungsmoosnamen am Kader vun der COVID-19 Kris, vun deenen och d'Betribler aus dem Speditiounssecteur profitéiere kënnen, wann se di respektiv Critèren erfëllen, sinn keng spezifesch finanziell Hëllef oder Ausgläichméiglechkeete virgesinn.

2. Wat wëll d'Regierung ënnerhuelen, fir datt Lëtzebuenger Transportentreprise géintwärtig der auslännescher Konkurrenz kompetitiv bleiwen?

Zanter dass d'Logistik als e prioritäre Secteur fir déi wirtschaftlech Entwécklung vum Land definéiert gouf huet de Wirtschaftsministère d'Entreprise aus dem Secteur kontinuierlech ënnerstützt fir Logistik Services mat enger méi héijer Valeur ajoutée ze entwéckelen. Als Beispill kann een d'Ëmsetzung vun enger Logistik Spezialisatiounspolitik fir d'Pharmazeutika an de cross-border E-Commerce nennen.

3. Wéi schätzt d'Regierung d'Bedeutung vun engem eegestännegen Lëtzebuenger Transportsecteur an? Hält si et fir wichtig, datt dee Secteur hei am Land eng Zukunft huet?

Lëtzebuerg huet, wéi all aner Memberstaat, en eegestännegen Transportsecteur. Dëse spillt an eiser Wirtschaft an an der Versuergung vum Land eng wichteg Roll. Well awer déi ganz Gesetzgebung op europäeschem Niveau ass an et deemno en oppene Maart ass, ass de Lëtzebuenger Transportsecteur der europäescher Konkurrenz ausgesetzt. Iwwert déi lescht zéng Joer konnt de Secteur sech op engem relativ stabillen Niveau halen, wann een d'Ziele vun de Betribler an hire Gefierer kuckt.

4. Wéi aner wichtig Secteure vun eiser Ekonomie, sinn och d'Transportentreprise zu engem groussen Deel op Grenzgänger ugewisen. Wéi wëll d'Regierung d'Resilienz vum Transportsecteur a Krisensituatiounen verbessern?

De Mangel u Chaufferen ass e Problem a ganz Europa. De Mobilitéitspak, deen am Summer d'lescht Joer ugeholl gouf, enthält Mesurë fir de Beruff rëm méi attraktiv ze maachen an déi Situatioun ze verbessern.

Niewent Ënnerstützungsmoosname wéi de Chômage partiel huet de Wirtschaftsministère mat der Hëllef vu Luxinnovation verschidde Moosnamen agefouert fir d'Resilienz vun allen Entrepreneuren, inklusiv déi aus dem Transportsecteur, ze verbessern, wéi zum Beispill de Programm Fit4Resilience fir Entrepreneuren ze hëllef sech nei ze erfannen, oder den Neistart Moosnamepak wat besonnesch d'Digitaliséierung ugeet (z.B. Route Optimiséierungs Planung).

5. Déi héich subventionéiert E-Mobilitéit ass fir de Speditiouns-Secteur (besonnesch fir déck Camionen an de Laangstreckentransport) keng wirtschaftlech Alternativ. Däitschland hëllef dem Secteur mat Primme fir hir Camionen op déi modernsten Dieselnormen ëmzestellen. Denkt d'Lëtzebuenger Regierung och un esou Moosname fir et dem Lëtzebuenger Speditiounssecteur ze erlaben, déi neisten a méi ëmweltfrëndlech Diesel-Modeller méi séier a méi käschtegëschteg anzeféieren?

Am Verglach mam europäeschen Ausland huet de Lëtzebuenger Transportsecteur en iwwerduerchschnëttlech jonke Fuerpark. Sou haten z.B. déi Entrepreneuren, déi sech am Kader vum Brexit beim Mobilitéitsministère gemellt haten, duerchschnëttlech 97,6 % Euro 6 Gefierer an hirem Fuerpark. D'Regierung plangt deemno net eng "Abwrackprämie" fir méi al Camionen anzeféieren.